

Oktober  
2009

	Telefoon	Faks
Hermanus	028 313 8000	028 313 1894
Gansbaai	028 384 8300	028 384 0241
Kleinmond	028 271 8400	028 271 4100
Stanford	028 341 8500	028 341 0445
24 Uur Beheerkamer Brandweer	028 313 8000/8111 028 312 2400	

# Bulletin

Amptelike nuusbrief van Munisipaliteit Overstrand

## SKUIWE IN DIE RAAD

### PIETER SCHOLTZ NUWE ONDERBURGEMEESTER

Die 64-jarige Petrus Albertus Scholtz van die Demokratiese Alliansie is op 1 September tydens die raadsvergadering van die Munisipaliteit Overstrand onbestede tot uitvoerende onderburgemeester verkies.

Hy kom in die plek van raadsheer Verrell Herbert, wat op 31 Julie vanjaar uit die amp getree het. Mnr Herbert het na Australië geëmigreer om nader aan sy dogter en kleinkinders te wees. Ook sy bejaarde vader woon in Australië.

Scholtz, wat 'n lang loopbaan in die SA Polisie gehad het en as 'n brigadier uitgetree het, dien reeds sedert die totstandkoming van die Overstrandse Munisipaliteit in die raad en het nog deurentyd die Demokratiese Alliansie as wyksraadslid verteenwoordig.

Na die 2006-verkiesing is hy deur die Uitvoerende Burgemeester, rdl Theo Beyleveldt, as lid van die Burgemeesterskomitee aangewys, aanvanklik vir die portefeulje Finansies en Bestuursdienste, maar met die herskikking van die komitee het hy die portefeulje vir Infrastruktuur, Beplanning en Ekonomiese Ontwikkeling oorgeneem en sal dit steeds as Onder-



Overstrand se Onderburgemeesterspaar, Ans en Pieter Scholtz

burgemeester behartig.

Rdl Philippus Appelgrein is deur rdl Beyleveldt as lid van sy Burgemeesterskomitee in die portefeulje Gemeenskapsdienste en Beskermingsdienste aangestel.

Sy ondervinding as wyksraadslid die afgelope drie jaar, tesame met 28 jaar wat



(Links) Rdl Philip Appelgrein, nuwe burgemeesterskomiteelid vir gemeenskaps- en beskermingsdienste. (Regs) Rhr Willie Smuts...Oud-Burgemeester wat na 26 jaar diens finaal uitgetree het.

in 'n ingenieursomgewing binne die Weermag verwerf is waar hy tot op direkteursvlak gevorder het, rus hom uitstekend vir sy nuwe rol toe. Dienslewering is vir hom 'n hoë prioriteit, en hy gaan hom ook beywer vir 'n omvattende sosio-ekonomiese ondersoek na behuising in Overstrand.

Die Demokratiese Alliansie het mnr Rudolf Smith aangewys om die vakature vir 'n proporsionele verteenwoordiger in die raad te vul. Dié aanstelling is op 15 September 2009 deur die OVK bevestig. Mnr Smith is 'n gemeenskapsleier van Hawston.

Raadsheer Willie Smuts, oud-burgemeester van sowel Overstrand (2000-2006) as Hangklip-Kleinmond (1995-2000), het op 2 September 2009 as raadslid van die Munisipaliteit Overstrand bedank en daarmee saam ook die amptuig by die Overbergse Distriksmunisipaliteit neergelê, waar hy Overstrand verteenwoordig en as voorsitter van Korporatiewe Dienste-portefeuljekomitee gedien het. Hy het 'n kontrakaanstelling by die Distriksmunisipaliteit aanvaar om as konsultant ten opsigte van raadslid dienste en arbeidsaangeleenthede, of na gelang van die Munisipale Bestuurder se behoeftes, kapasiteit te bou.

Mnr Smuts, wat die eretitel van raadsheer twee keer ontvang het, het 'n loopbaan van 26 jaar in plaaslike bestuur en was in die jare tagtig ook burgemeester op Vereeniging. Hy het nou ook die tuig as voorsitter van die Wes-Kaapse Nieu-metro-bedingingsraad neergelê.

Mnr Smuts was 'n proporsionele verteenwoordiger van die ANC, wat nog nie bekend gemaak het wie hom gaan opvolg as raadslid nie.

## STANFORD-HUISE OORHANDIG

Die eerste huise van die laekostebehuisingprojek op Stanford is op Woensdag 26 Augustus 2009 aan hul nuwe eienaars oorhandig – presies negentien weke nadat die eerste sooi gespit is.

En watter verdienstelike gevalle was die eerste begunstigdes nie: die gestremde Karel en Elizabeth Blok, wat na 'n leeftyd van harde werk op plase in die Stanford-omgewing nou 'n permanente holtte vir hul voete gevind het; en die egpaar Sandile en Nosisa Mgwaza, wat die verskriklike verlies van drie kinders in 'n hutbrand verwerk het met die droom om 'n nuwe lewe in 'n behoorlike huis te begin.

In 'n brief wat namens die Mgwazas voorgelees is, vertel Sandile dat 25 November 2005 die ergste dag in hul lewens was toe hul geliefde kinders Ntombi Siyathemba, Lulama en Lulamile in die brand omgekom het. Hulle het hulself verwyrt oor die bestaan wat hulle in 'n plakkerstruktuur gevoer het en van toe af elke dag daarvan gedroom om 'n huis te kry. "Ek wens ek het 'n duisend monde gehad om vir julle te kan

bedank," het hy gesê.

Die res van die huise is sedertdien stuksgewys aan hul eienaars oorhandig. In dié proses onderteken elke ontvanger 'n koopkontrak, open 'n rekening by die munisipaliteit en bevestig skriftelik dat hy of sy tevrede is met die kwaliteit van die huise.

Die Stanford-projek het uit 88 huise bestaan wat deur M5 Developments Cape ontwikkel is. Mnr Rieger van Rooyen, direkteur van M5, het gesê hul benadering was om vir die ontvangers 'n veilige plek te gee waarin dit aangenaam sal wees om te woon. Die ontwerp van die huise is aangepas om met 'n bykomende deur met 'n glaspaneel en groter aluminiumraamvensters meer lig in die huise te bring.

Die Burgemeester, rdl Theo Beyleveldt, het gesê daar word geswoeg om nog grond vir behuising op Stanford te vind en dat daar binne die volgende ses maande uitsluitel daarvoor verwag kan word. Wat die res van die behuisingprogram betref, word die volgende projek op Bettysbaai aangepak, en daarna volg Kleinmond.



Burgemeester Theo Beyleveldt knip die lint by die voordeur van Sandile en Nosisa Mgwaza se huis terwyl mnr Boginkosi Madikizela, Minister van Behuising (heel links) en Rieger van Rooyen, direkteur van die ontwikkelaar M5 Developments Cape (heel regs), toekyk.

## PRINGLEBAAI-SAAL INGEWY



Die Tru-Cape Kogelberg-uitdaging was een van die eerste byeenkomste wat in die nuwe gemeenskapsaal aangebied is.

Overstrand wil graag gesonde gemeenskapslewe sien ontwikkel en het daarom in die afgelope drie jaar nie minder nie as ses tien gemeenskapsale opgegradeer of van meet af gebou.

Die splinternuwe Pringlebaai-saal wat op 25 Augustus feestelik in gebruik geneem is, was die laaste van hierdie projekte, maar waarskynlik die een waarvoor daar die hardste gewerk is.

Dié uitsigryke kusdorp se damesklub beywer hulle al reeds vyftien jaar vir 'n saal. Tot nou toe was die enigste lokaal wat beskikbaar was vir hul welsynswerk en ander gemeenskapsbedrywighede die plaaslike kerkgebou, wat nie vir alles geskik is nie – veral nie as 'n mens na 'n harde jaar se werksaamhede die Ou Jaar wil uitdans nie.

Die jarelange proses om 'n gemeenskapsaal te kry, is dikwels deur administratiewe rompslomp in die wiele gery.

Eers moes 'n geskikte gedeelte meentgrond geïdentifiseer, onderverdeel, gehersoneer en aan 'n omgewingsimpakstudie onderwerp word. Geld is voorsien op die begroting, maar die tender was te hoog... en so het dit aangegaan.

Gelukkig is daar altyd uiteindelik oplossings vir probleme gevind. Wat die konstruksie betref, is daar op 'n alternatiewe boumetode besluit waar die gebou uit 'n ligte staalraamwerk bestaan en dan aan die binne- en buitekant met bedekingsmateriaal beklee word.

Die tender is aan Overberg Light Steel Construction toegeken, en die projek is binne drie maande afgehandel. Inwoners van Pringlebaai was baie opgewonde oor die projek en het dikwels die terrein besoek om met die kontrakteurs te gesels en die vordering mee te maak.

Die saal, met 'n oppervlakte van bykans 300 m<sup>2</sup>, is teen 'n totale boukoste van R1,7 m voltooi. Die afwerking is deurlopend van hoogstaande gehalte.

Die toegangspad vanuit Buffelsweg en die onmiddellike terrein om die gebou sal eersdaags geplaavei word om die projek finaal af te rond.

Volgens munisipale beleid word gemeenskapsale deur 'n bestuurskomitee bestaande uit plaaslike inwoners bestuur. In Pringlebaai bestaan hierdie komitee hoofsaaklik uit lede van die damesklub. Die damesklub het hulle hande diep in die sak gestee om toerusting en dergelike items aan te koop.

Die saal word reeds aktief benut en verskeie besprekings is al ontvang. Kontak Rina Scholtz by 073 203 1487 vir meer besonderhede.



## EERVOLLE VERMELDING VIR GANSBAAI-PROJEK

Die Gansbaai-rioolwerke was die enigste projek in sy kategorie wat eervolle vermelding ("commendation") ontvang het by vanjaar se toekenningsplegtigheid wat op 12 Augustus 2009 vir uitmuntende ingenieurswerk deur Raadgewende Ingenieurs Suid-Afrika (CESA) aangebied is. Die projek was een van sewe inskrywings in die kategorie van projekte tussen R 10 miljoen en R 100 miljoen. Die wenner in dié kategorie was die Ntimbale-dam in Botswana. Van links staan Pieter Jordaan van Stewart Scott International, wat die Gansbaai-projek bestuur het, Felix Foncoqa, president van CESA, Andrew Chislett, verteenwoordiger van die borg Glenwood MIB, en Dennis Hendriks, Overstrand Munisipaliteit se bestuurder van infrastruktuurprojekte en ontwikkelingsbeheer.

## TEEPARTYTJIE OP KLEINMOND

Die Burgemeestersvrou se teepartytjie vir Hangklip-Kleinmond se inwoners ouer as 70 word op Woensdag 21 Oktober om 10:00 in die Proteadorp-gemeenskapsaal aangebied.

Mense wat wil bywoon of dalk wil help, kan vir Wilna Hooneberg, Kleinmond se bibliotekaresse, by 028 271 8430 of 028 271 4021 skakel. Sy kan ook per faks bereik word by 028 271 3732 of per e-pos by [whooneberg@overstrand.gov.za](mailto:whooneberg@overstrand.gov.za)

## MORELESTANDAARDEINISIATIEF: N' 7

### GOEIE BURGERSKAP

Goeie Burgerskap is die sesde en laaste morele standaard waarop die Groter-Hermanus Morelestandaarde-inisiatief (MSI) fokus. Hierdie ses waardes vorm die boustene van die morele karakter van ons as individue en dus kollektief van die gemeenskap waarbinne ons saamleef.

In **Goeie Burgerskap** kom die morele standaard van **Betroubaarheid, Respek, Verantwoordelikheid, Regverdigheid en Omgee** tot uiting in hoe elkeen sy of haar rol en verantwoordelikheid as burger van die gemeenskap uitleef.

**Goeie Burgerskap beteken onder meer in die praktyk dat:**

- inwoners hul finansiële verpligtinge nakom en volhoubare reëlins tref rondom hierdie verpligtinge. Hulle ry nie op die rug van medeburgers in hul gebruik van die voorregte en dienste wat in die gemeenskap beskikbaar is nie;
- inwoners glo en erken dat wette, regulasies en reëls, hoe persoonlik onpopulêr dit ook al mag wees, nodig is vir die suksesvolle werking

van 'n gemeenskap en hulle tree wetsgehoorsaam op omdat hulle glo dis die verantwoordelike ding om te doen;

- inwoners altyd sal poog om goeie buurmanskap te openbaar en ander se reg op privaatheid en eendoms te respekteer en hulle tree beskaafd en bedagsaam teenoor hul medeburgers op;
- inwoners op opbouende wyse by sake van openbare belang betrokke sal raak;
- inwoners sal saamwerk om die omgewing te bewaar en netjies en skoon te hou; en
- die owerhede en gemeenskapsleiers deur hul optrede burgers tot goeie burgerskap sal inspireer.

**Dink gerus na oor wat jou sterk- en swakpunte ten opsigte van Goeie Burgerskap is en wat jy kan doen om die swakpunte uit te skakel.**

Enige kommentaar of voorstelle oor die Morelestandaarde-inisiatief kan gerus gerig word aan [ernstes@vodamail.co.za](mailto:ernstes@vodamail.co.za) of per SMS na 082 412 4538/082 470 3975.

## WÊRELDOMGEWINGSKALENDER: N' 7

### WÊRELDHABITATDAG

Wêreldhabitatdag word elke jaar op die eerste Maandag van Oktober gevier. Die Verenigde Nasies het hierdie dag geoormerk in 'n poging om mense te laat nadink oor die stand van ons stede en dorpe en die reg wat almal tot 'n toereikende skuiling het. Dit het ook ten doel om die wêreld daaraan te herinner dat dit kollektief daarvoor verantwoordelik is om die toekoms van die menslike habitat te verseker.

In 2009 is die tema vir Wêreldhabitatdag *Beplanning vir ons stedelike toekoms*. Dit is belangrik om bewustheid te skep van die behoefte aan verbeterde stedelike beplanning ten einde die groot uitdagings inherent aan die 21ste eeu die hoof te bied. Oral in die wêreld ervaar stede en dorpe die impak van klimaatsverandering, oorbevolking, die uitputting van hulpbronne en verskeie ander faktore al hoe feller. In baie dele van die wêreld is

stedelike beplanningstelsels ongelukkig nie opgewasse om die uitdagings waarvoor moderne stede en dorpe te staan kom, die hoof te bied nie.

'n Geïntegreerde benadering word tans in die Wes-Kaap geïmplementeer om van hierdie agterstande werk te maak. Die Wes-Kaapse Provinsiale Ruimtelike Ontwikkelingsplan is 'n poging om te verhoed dat vorige besluitnemers se ontwikkelingsfoute herhaal word. Hierdie plan gaan op ekologiese integriteit, maatskaplike welsyn en ekonomiese ontwikkeling fokus wat die sogenaamde driedubbele grondbeginsels van volhoubare ontwikkeling verteenwoordig. Hierdie plan sal besluitnemers op die terreine van grondgebruik en omgewingsbestuur help om te besluit of voorgestelde ontwikkelings, inaggenome die drie steunpilare van hierdie beginsel, haalbaar is al dan nie.

EKONOMIESE  
EFFEKTIVITEIT  
(ekonomiese kapitaal)  
VOORUITGANG

SOSIALE  
GELYKHEID  
(menselike kapitaal)  
MENSE

EKOLOGIESE  
INTEGRIEIT  
(ekologiese kapitaal)  
PLANEET

**NASIONALE BEDROG  
BLITSLYN**

**0800 701 701**